

編號 1 號

【路燈著咧】林伯殷原作

臨暗邊仔，天還㑹暗，屋脣个路燈就著咗，係無同佢看較真兜仔，頭下碼¹還正經毋知路燈既經著哩，一直愛等到天大暗，路燈个電火緊來緊光，正確確實實知講自家屋脣个路燈有著咗！在暗晡頭，這支路燈摺吾屋脣个大路箭到²光光，同出出入入个人車都照到清清楚楚。逐日食飽夜，鄰舍會企在路燈下打嘴鼓，共下等垃圾車來；熱天時節，屋肚較熱，路燈下自然又變成大家寮涼、散步个所在；等到寒天，路燈又像係一蕊光明燈，就像係企在該等等同人講：「看著佢，燒暖个屋下就到咧！」

臨天光仔，路燈就起勢定定仔行下戲棚，天越光，路燈火就越看毋著，最尾，連幾時烏忒个乜無人知。路燈盡知進退，完全毋會去同日頭搶光³，日時頭，路燈就在該恬恬等，等到夜來个時節就做得好好發揮哩！

斷烏咧，路燈準時來上棚⁴！摺負責个所在照到光光光，久

咧，人叻分路燈縱壞，毋記得佢逐夜就恁認分、恁煞猛，一直愛到有一暗晡，發現著原本愛光个地方還暗暗，正會知路燈原來有恁好！想起吾个老屋，暗晡頭屋脣滿哪仔暗摸叮咚⁵，係無擎火⁶，根本就行無路，毋使想出半步門，毋過，就算有擎火行路，該細粒電珠仔⁷發出弱弱个光，照得路來，驚頭那頂有蜷崎絲；照得頭那頂來，又驚蛇哥隨時會對路脣弄出來⁸，毋管自家仰般細心細意，心肝肚還係會驚驚險險⁹，哪當得¹⁰這下个路燈火，分人恁安心、恁自在！

一支路燈，照光个地方盡有限，毋過，路燈係一支一支仔連起來，該就做得照亮一隻莊頭、一條街路、一座都市，路燈毋單淨照亮一隻地方，乜減少咧日摺夜个爭差¹¹，改變咧人个生活，都市肚个公園，暗晡頭還有人在該練氣功、跳舞同運動，大路也還有人行路、騎自行車，係無路燈，敢有可能？

暗咗，路燈又著咧！佢知路燈會同當多暗暗个地方照到光光，分人方便上下、分人做得安心，佢乜知有當多人同路燈共樣，恬恬在該照亮佢个社會。

¹ 頭下碼：音 teu^ˇ ha ma^ˊ；剛開始的時候。

² 箭到：音 jien do；直射至。

³ 搶光：音 qiong^ˋ gong^ˊ；爭著出風頭。

⁴ 上棚：音 song^ˊ pang^ˋ；上場了。

⁵ 暗摸叮咚：音 am mo^ˊ din^ˊ dung^ˊ；天色或環境暗得看不見的樣子，形容一片漆黑。

⁶ 擎火：音 kia^ˋ fo^ˋ；拿著手電筒。

⁷ 電珠仔：音 tien zu^ˊ e^ˋ；燈泡。

⁸ 弄出來：音 nung cud^ˋ loi^ˋ；鑽出來。

⁹ 驚驚險險：音 giang^ˊ giang^ˊ hiam^ˋ hiam^ˋ；感到驚險可怕的樣子。

¹⁰ 哪當得：音 nai dong ded^ˋ；怎麼比得過。

¹¹ 爭差：音 zang^ˊ ca^ˊ；差別。